

Skok s rive

Moj mići brat
s rive se bojal va
more skakat.
„Daj ga navadi“,
zamolila me moja mat.

Celo jutro va more je gledal,
ali hrabrost
nikako da mu dojde;
malo mu pride,
Mmalo mu projde.

Od tuge je počel plakat:
„Nikad se neću va more
navadit skakat!“

A onda je na crekve polne tuklo
i na obed je tribalo poč.
Moj mići brat je još vavik na rive stal;
nikako mu hrabrost doć.

Tad je pasal jedan
veli brod i storil
silni val.
Lipo san brata
rinul va more
i na obed doma šal.

Zapolne je s rive
skakal i svimi se hvalil
da ga je skakat va more
njegov stariji brat navadil.

Tomislav Stašić